

Alver kommune
Att:
Postboks 4
5906 FREKHAUG

Alver kommune - Uttale til varsel om oppstart av reguleringsarbeid Hanevika på gnr421 bnr2

Vi syner til brev frå Vill Plan AS datert 15.12.21 om varsel om oppstart av reguleringsarbeid på gnr421 bnr2 Hanevika i Alver kommune.

Føremål og planstatus

Føremålet med planen er å leggje til rett for utvikling og etablering av inntil 12 bustader, naust og småbåthamn.

Planlagde tiltak er i tråd med gjeldane arealformål i gamle Radøy kommune sin arealdel av kommuneplan. Området er konsekvensutgreia i kommuneplanen, og det er vurdert at det ikkje er krav om KU i denne reguleringsplanen.

Fiskeridirektoratet sin rolle i planarbeid

Fiskeridirektoratet er styresmaktene sitt rådgjevande og utøvande organ innan fiskeri- og havbruksforvaltninga. I saker som får følge for desse næringane, er det vårt ansvar å sikre deira interesser samstundes som vi skal sikre omsynet til det marine biologiske mangfaldet. Dei marine leve- og oppvekstområda, som til dømes gytefelt, er særleg viktige å ta vare på, slik at komande generasjonar også kan hauste frå havet.

Vår vurdering - Småbåthamn

Vi er ikkje kjende med at det er fiskeriinteresser i nærleiken av planområdet, men det er i kartverktøyet vårt [Yggdrasil](#) registrert store førekomstar av kamskjel verdi-kategorisert som viktig.

På oppdrag frå Miljødirektoratet utarbeida COWI AS i 2017 fagrapporten [Miljøvennlige småbåthavner](#). Rapporten seier mellom anna at miljøundersøkingar under eksisterande småbåthamner har synt at både sediment, grunnmassar, sandfangmassar og lause massar som ligg på opplagsplassar er sterkt forureina av mellom anna kobbar, sink og TBT. I tillegg er utslepp av drivstoff, olje, botnstoff og maling med på å forureine.

Rapporten inneheld generelle retningslinjer for drift og utvikling av småbåthamner for å gjere dei meir miljøvenlege. Vi oppmodar kommunen til å nytte desse retningslinjene.

I tillegg syner vi til CIENS-rapport: 2-2011 «Helhetlig planlegging og utvikling av miljøvennlige småbåthavner. Kunnskapsstatus» som gir ei rekkje råd om korleis negativ miljøpåverknad frå småbåthamner kan avgrensast:

Lokalisering

- Småbåthamner må planleggast slik at dei ikkje avgrensar naturleg sirkulasjon styrt av tidevatn eller straum.
- Området bør ha god utskifting av vatn og god vassdjup under bryggeanlegget.
- Unngå plassering over/nær viktige marine naturtypar som ålegrasenger eller andre sårbare naturtypar, viktige områder med blautbotn i strandsona, og lokalitetar med sårbare og trua artar på land.
- Det bør vere stor nok avstand til kjente gyteplassar og fiske/skjelanlegg i sjøen.

Utforming

- Innlaup og bryggeanlegg må planleggast slik at dei opprettheld vassirkulasjonen maksimalt. Det kan vere naudsynt med meir enn eitt innlaup.
- Flytebrygger, bølgebrytarar og molo må ha opningar som sørgjer for vassirkulasjon. Bryggene bør også ha passasje mot land der vatnet kan strøyme forbi.
- For nye båthamner eller ved utvidingar av eksisterande båthamner bør ei open løysing veljast.
- Bølgjedemparar eller bølgebrytarar bør nyttast framfor å legge hamna i veldig skjerma områder.

Drift

- Det må etablerast rutinar for oppsamling av miljøfarleg avfall ved vedlikehald.
- Det bør vere tilbod om alternative metodar for miljøvenleg vedlikehald av båt.
- Det bør vere eit avgrensa område for vedlikehald av båt og vask, med lukka vassystem og oppsamlingskummar slik at miljøfarlege stoff ikkje kjem ut i det marine miljø eller avlaupssystemet.
- Større reparasjonar, sandblåsing etc. bør skje innandørs i hall.
- Ein må ha vaskestasjon for båtar slik at bruk av midlar som skal hindre tilgroing kan unngåast/reduserast.

Kommunen bør vurdere om nokon av punkta overfor skal takast inn i føresegnene til planen, mellom anna dei som kan hindre at marint liv verte negativt påverka.

Fiskeridirektoratet region Vest ber om at de tek omsyn til våre innspel og at vi får plan på høyring.

Med helsing

Leni Marie Lisæter
seksjonssjef

Charlotte Skeide Norseng
rådgiver



Brevet er godkjent elektronisk og vert sendt utan handskriven underskrift.



Mottakarliste:

Alver kommune

Postboks 4

5906

FREKHAUG

Kopi til:

Fiskarlaget Vest

Slottsgaten 3

5003

BERGEN

Kystverket Vest

Postboks 1502

6025

ÅLESUND

Statsforvaltaren i Vestland

Njøsavegen 2

6863

LEIKANGER

Vestland fylkeskommune

Postboks 7900

5020

BERGEN

